

# **ZAKON**

**O UGOSTITELJSKOJ DJELATNOSTI  
BRČKO DISTRIKTA BiH**

Na osnovu člana 23. Statuta Brčko distrikta Bosne i Hercegovine, Skupština Brčko distrikta Bosne i Hercegovine, na 19. sjednici održanoj 31. oktobra 2005. godine, usvaja

## **ZAKON**

O UGOSTITELJSKOJ DJELATNOSTI **BRČKO** DISTRIKTA **BiH**

### **I. OPĆE ODREDBE**

#### **Član 1**

Ovim zakonom uređuje se način i uslovi pod kojima pravna i fizička lica mogu obavljati ugostiteljsku djelatnost.

#### **Član 2**

- (1) Ugostiteljska djelatnost u smislu ovog zakona je pripremanje i pružanje usluga prehrane, pripremanje i usluživanje pića i napitaka i pružanje usluga smještaja.
- (2) Ugostiteljska djelatnost je i pripremanje hrane za potrošnju na drugom mjestu (u prevoznim sredstvima, na priredbama i sl.) i snabdijevanje tom hranom (catering).

#### **Član 3**

- (1) Ugostiteljsku djelatnost obavljaju preduzeća i druga pravna i fizička lica koja su upisana u sudski registar za vršenje te djelatnosti i ispunjavaju ostale propisane uslove za obavljanje te djelatnosti (u daljem tekstu: ugostitelj).
- (2) Ugostiteljsku djelatnost pod uslovima propisanim ovim zakonom u svojim poslovnim prostorijama i prostorima mogu obavljati i ugostiteljske obrazovne ustanove te đački i studentski domovi.
- (3) Ugostitelj može, bez upisa u registar, obavljati i druge djelatnosti u manjoj mjeri koje služe obavljanju ugostiteljske djelatnosti, a koje se uobičajeno obavljaju uz ugostiteljsku djelatnost (prodaja novina i časopisa, duhanskih prerađevina, pružanje usluga bilijara, boćanja, kuglanja, tenisa i sl.).
- (4) Pod uslovima propisanim ovim zakonom i propisima donesenim na osnovu ovog zakona, određene ugostiteljske usluge mogu pružati i građani.

#### **Član 4**

- (1) Pravna i fizička lica mogu organizovati pružanje usluga smještaja i prehrane za svoje radnike, članove, penzionere te članove uže porodice svojih radnika i penzionere s prebivalištem u BiH, pod uslovima utvrđenim ovim zakonom i drugim propisima, u objektima zatvorenog tipa (odmaralište, objekt za prehranu i sl.).
- (2) Članovi uže porodice u smislu odredbe stava 1 ovog člana su: supružnici, djeca, pastorčad i usvojenici, te roditelji i usvojitelji.
- (3) Pravna i fizička lica iz stava 1 ovog člana obavezna su pružanje ugostiteljskih usluga prijaviti Odjeljenju za javnu sigurnost (u daljnjem tekstu: nadležno odjeljenje), koje to upisuje u registar o pružanju ugostiteljskih usluga iz stava 1 ovog člana.
- (4) Gradonačelnik će na prijedlog šefa odjeljenja nadležnog za ugostiteljstvo propisati minimalne tehničke uslove za pružanje usluga iz stava 1 ovog člana.

- (5) Nadležno odjeljenje utvrđuje ispunjavanje uslova iz propisa donijetog na osnovu stava 4 ovog člana.
- (6) Gradonačelnik će na prijedlog šefa nadležnog odjeljenja propisati sadržaj i oblik obrasca prijave i način vođenja registra o pružanju ugostiteljskih usluga pravnih i fizičkih lica iz stava 1 ovog člana.

#### **Član 5**

Odredbe ovog zakona ne primjenjuju se na pružanje usluga prehrane i smještaja u objektima ustanova socijalne zaštite, odgoja, obrazovanja i drugih sličnih ustanova i Policije Brčko distrikta BiH, ako te usluge pružaju njihovi radnici isključivo svojim radnicima, pripadnicima i korisnicima.

#### **Član 6**

Ne smatra se ugostiteljskom djelatnošću pripremanje i usluživanje toplih i hladnih napitaka, bezalkoholnih pića i jednostavnih jela, koja pravna i fizička lica organizuju za potrebe svojih radnika i članova u svojim poslovnim prostorijama i prostorima.

## **II. PREDMET I NAČIN POSLOVANJA UGOSTITELJA**

#### **Član 7**

Predmet poslovanja ugostitelja mora biti određen u skladu sa odredbama ovog zakona i drugim propisima i poslovnim običajima u ugostiteljstvu te vrstama i načinu pružanja ugostiteljskih usluga u odgovarajućim objektima.

#### **Član 8**

- (1) Ugostitelj posluje tokom cijele godine ili sezonski.
- (2) Ugostitelj može poslovati i povremeno (za vrijeme trajanja manifestacija, sajmova, prigodnih priredbi i sl.).
- (3) Ugostitelj utvrđuje razdoblje poslovanja iz stava 1 ovog člana za svaki ugostiteljski objekat i o tome obavještava nadležno odjeljenje i Poreznu upravu Brčko distrikta BiH.

#### **Član 9**

- (1) Skupština na prijedlog Vlade Brčko distrikta BiH (u daljem tekstu: Vlada) donosi odluku o radnom vremenu u kojem se može obavljati ugostiteljska djelatnost.
- (2) Vlada Brčko distrikta BiH može odrediti drugačije radno vrijeme za pojedine ugostiteljske objekte, a u skladu s kriterijima koje propiše Skupština propisom iz stava 1 ovog člana.

#### **Član 10**

- (1) U obavljanju ugostiteljske djelatnosti ugostitelj je dužan:
  1. vidno istaknuti oznaku vrste, naziv i kategoriju ugostiteljskog objekta na ulazu u ugostiteljski objekat;
  2. vidno istaknuti radno vrijeme na ulazu u ugostiteljski objekat u skladu s propisima i pridržavati se istaknutog radnog vremena;
  3. utvrditi kućni red u ugostiteljskom objektu za smještaj i istaknuti ga na recepciji, u svim sobama i apartmanima;
  4. utvrditi normative o utrošku namirnica, pića i napitaka za pojedine usluge prehrane, pića i napitaka, pružiti usluge u količinama i kvalitetu u skladu s normativima te na zahtjev normativ predočiti gostu;

5. vidno istaknuti cijene usluga koje se nude, na način dostupan gostima i pridržavati se istaknutih i objavljenih cijena, a kod pružanja usluga smještaja u cjenovnicima istaknuti iznos boravišne takse, cjenovnike staviti na raspolaganje gostima u dovoljnom broju primjeraka;
  6. da za svaku pojedinačno ostvarenu uslugu naplaćenu u gotovom novcu korisniku usluge izda blok registar blagajne o vrsti, količini i cijeni pruženih usluga, s tim da blok registar blagajne mora najmanje sadržavati naziv poreznog obveznika, serijski broj, datum, prodajnu vrijednost po vrstama proizvoda, a kod pružanja usluga smještaja račun sa specifikacijom usluga i navedenim iznosom boravišne takse;
  7. voditi knjige gostiju u ugostiteljskom objektu za smještaj;
  8. voditi knjigu žalbi na propisan način u svakom ugostiteljskom objektu, u roku od tri dana izjavljeni prigovor dostaviti tržišnoj inspekciji, te u roku od 15 dana od dana izjavljenog prigovora odgovoriti na prigovor;
  9. u ugostiteljskom objektu voditi u skladu s propisima evidenciju o nabavljenim i utrošenim količinama hrane, pića i napitaka.
- (2) Ugostitelj ne smije usluživati alkoholna pića gostu mlađem od 18 godina.
  - (3) Gradonačelnik će na prijedlog šefa odjeljenja nadležnog za ugostiteljstvo propisati oblik, sadržaj i način vođenja knjiga gostiju te knjige žalbi.
  - (4) Ugostitelj koji u ugostiteljskom objektu pruža usluge turistima obavezan je uz naziv vrste objekta i kategorije, istaknuti i oznaku da se u tom objektu pružaju usluge turistima.
  - (5) Skupština može na prijedlog gradonačelnika odrediti prostore na kojima se pružaju usluge turistima.

### **Član 11**

Prilikom oglašavanja i reklamiranja usluga i isticanja poruka u komercijalnom poslovanju, ugostitelj ne smije koristiti oznaku propisane vrste i kategorije objekta koja nije utvrđena rješenjem nadležnog odjeljenja.

### **Član 12**

- (1) Ugostitelj može pružati i jednostavne ugostiteljske usluge.
- (2) Jednostavnom ugostiteljskom uslugom u smislu ovog zakona smatra se pripremanje i usluživanje jela bez složenije kuhinjske pripreme, kao i pripremanje i usluživanje pića i napitaka.
- (3) Jednostavne ugostiteljske usluge mogu se pružati i ambulantno (izvan poslovnih prostorija i prostora ugostitelja).
- (4) Ambulantno se mogu usluživati jela u konfekcioniranom stanju, bezalkoholna pića u originalnom pakovanju i napici u skladu sa zahtjevima higijene te sladoled u originalnom pakovanju.
- (5) Odjeljenje nadležno za urbanizam može odrediti prostore na kojima se jednostavne ugostiteljske usluge mogu pružati ambulantno.
- (6) Odredbe člana 10 stava 1 tačke 1, 2, 3, 7 i 8 ne primjenjuju se na pružanje jednostavnih ugostiteljskih usluga ambulantno, a odredbe člana 10 stava 6 primjenjuju se na odgovarajući način (mogu se izdavati računi - paragon blokovi koji se pišu u dva primjerka od kojih jedan ostaje u bloku, a drugi se izdaje korisniku usluge).
- (7) Gradonačelnik donosi propise o minimalnim tehničkim uslovima za obavljanje ugostiteljskih usluga iz stava 3 ovog člana.

### **III. POSLOVNI OBJEKAT, PROSTORIJA I PROSTOR, MINIMALNI USLOVI I KATEGORIZACIJA UGOSTITELJSKIH OBJEKATA**

#### **Član 13**

- (1) Za obavljanje ugostiteljske djelatnosti i pružanje ugostiteljskih usluga moraju biti ispunjeni minimalni tehnički uslovi u pogledu prostora, uređaja i opreme ugostiteljskih objekata, kao i drugi uslovi propisani ovim zakonom i propisima donesenim na osnovu ovog zakona (u daljnjem tekstu: minimalni uslovi).
- (2) Za obavljanje ugostiteljske djelatnosti i pružanje ugostiteljskih usluga moraju biti ispunjeni zdravstveni uslovi za rad u ugostiteljstvu u skladu s posebnim propisima.
- (3) Gradonačelnik će na prijedlog šefa odjeljenja nadležnog za ugostiteljstvo, a u sporazumu sa šefovima nadležnih odjeljenja za poslove zdravstva i zaštite životne sredine donijeti bliže propise o minimalnim tehničkim uslovima u pogledu prostora, uređaja i opreme ugostiteljskog objekta.

#### **Član 14**

- (1) Ugostiteljska djelatnost obavlja se u poslovnom objektu, prostoriji i na prostoru namijenjenom, uređenom i opremljenom za pružanje ugostiteljskih usluga (u daljem tekstu: ugostiteljski objekat).
- (2) Ugostiteljska djelatnost može se obavljati i u poslovnom objektu, prostoriji i na prostoru gdje se obavlja druga djelatnost ako su za obavljanje ugostiteljske djelatnosti ispunjeni propisani uslovi.

#### **Član 15**

- (1) S obzirom na vrste ugostiteljskih usluga koje se u njima pružaju, objekti mogu biti:
  1. Smještajni objekti – objekti u kojima se pružaju usluge smještaja, prehrane, pića, napitaka i slastica;
  2. Ugostiteljski objekti-objekti u kojima se pružaju usluge prehrane, pića, napitaka i slastica;
  3. Catering objekti – objekti u kojima se pripremaju jela, slastice, pića i napici za konzumiranje na drugom mjestu sa ili bez usluživanja.
- (2) Objekti iz stava 1 ovog člana razvrstavaju se u grupe i to:
  1. Smještajni objekti u grupe:
    - hoteli
    - kampovi i druge vrste objekata za smještaj
  2. Ugostiteljski objekti u grupe:
    - restorani
    - barovi
  3. Catering objekti u grupe:
    - pripremnice jela, pića i napitaka
    - kantine
- (3) Objekti iz grupa navedenih u stavu 2 ovog člana razvrstavaju se u pojedine vrste polazeći od načina usluživanja i pretežnosti usluga koje se pružaju u objektu.
- (4) Gradonačelnik će na prijedlog šefa odjeljenja nadležnog za ugostiteljstvo propisati minimum ugostiteljskih usluga koje se moraju pružati u pojedinoj vrsti objekta.

## **Član 16**

- (1) Gradonačelnik će na prijedlog šefa odjeljenja nadležnog za ugostiteljstvo propisom iz člana 15 stava 4 ovog zakona propisati koje se vrste objekata kategorišu, kategorije, elemente i ostale uslove za kategorije, oznake za kategorije i način označavanja kategorija, te način kategorizacije objekata.
- (2) Ugostiteljski objekti kategorišu se zavisno o uređenju, opremi, uređajima, uslugama, održavanju i drugim elementima i mjerilima za kategorizaciju.

## **Član 17**

Ugostiteljski objekat koji prestane ispunjavati uslove propisane za određenu vrstu i kategoriju objekta ne može poslovati kao ta vrsta i kategorija ugostiteljskog objekta.

## **Član 18**

- (1) Ugostiteljski objekat može imati naziv jedne vrste ugostiteljskog objekta ovisno o vrsti usluga koje se pretežno pružaju u objektu.
- (2) Iznimno od odredbe stava 1 ovog člana, ugostiteljski objekat može imati naziv dvije vrste ugostiteljskog objekta, ako za svaku vrstu ispunjava uslove propisane ovim zakonom i drugim propisima.

## **Član 19**

Naziv vrste ugostiteljskog objekta može se promijeniti, ako su ispunjeni uslovi propisani za pružanje druge vrste usluge u ugostiteljskom objektu.

## **Član 20**

Ugostitelj ne može početi obavljati ugostiteljsku djelatnost u ugostiteljskom objektu, prije nego što od nadležnog odjeljenja pribavi rješenje o ispunjavanju minimalnih uslova.

## **Član 21**

- (1) Za svaki ugostiteljski objekat, ugostitelj mora odrediti odgovorno lice (poslovođa, direktor i sl.), ugostiteljskog objekta (u daljnjem tekstu: odgovorno lice).
- (2) Iznimno od odredbe stava 1 ovog člana, ugostitelj može imati jedno odgovorno lice i za više ugostiteljskih objekata za smještaj - vrste apartmani, sobe za iznajmljivanje i kuće za odmor.
- (3) Ako ugostitelj fizičko lice lično vodi poslovanje ugostiteljskog objekta, mora udovoljiti i uslovima propisanim za odgovorno lice.
- (4) Odgovorno lice odgovorno je za poslovanje ugostiteljskog objekta u skladu sa ovim zakonom.

## **Član 22**

Odgovorno lice mora imati najmanje srednju stručnu spremu.

#### **IV. POSTUPAK ZA UTVRĐIVANJE MINIMALNIH USLOVA I USLOVA ZA KATEGORIJU UGOSTITELJSKIH OBJEKATA**

##### **Član 23**

- (1) Nadležno odjeljenje, na zahtjev ugostitelja, utvrđuje da li su ispunjeni minimalni uslovi za ugostiteljske objekte.
- (2) Ispunjavanje uslova iz stava 1 ovog člana nadležno odjeljenje utvrđuje rješenjem u roku od 30 dana od dana uredno podnesenog zahtjeva.
- (3) Rješenje iz stava 2 ovog člana upisuje se u registar o minimalnim uslovima koji vodi nadležno odjeljenje odvojeno za smještajne objekte, za ugostiteljske objekte i za catering objekte.
- (4) Troškove postupka iz stava 1 ovog člana snosi ugostitelj.

##### **Član 24**

- (1) Ako nadležno odjeljenje ne donese rješenje iz člana 23 stava 2 ovog zakona u propisanom roku ili ne donese rješenje kojim se zahtjev odbija zbog neispunjavanja propisanih uslova, ugostitelj može otpočeti sa radom u ugostiteljskom objektu, o čemu je dužan prethodno pismeno obavijestiti nadležno odjeljenje.
- (2) Nadležno odjeljenje dužno je donijeti rješenje iz člana 23 stava 2 ovog zakona u roku od 30 dana od dana primljene obavijesti iz stava 1 ovog člana.
- (3) Ako nadležno odjeljenje utvrdi da nisu ispunjeni uslovi propisani ovim zakonom, a ugostitelj je započeo sa radom na osnovu stava 1 ovog člana, odredit će se rok za ispunjenje tih uslova.

##### **Član 25**

- (1) Nadležno odjeljenje, na zahtjev ugostitelja, utvrđuje da li su ispunjeni uslovi za kategoriju za ugostiteljske objekte.
- (2) Ispunjavanje minimalnih uslova za kategoriju ugostiteljskih objekata iz stava 1 ovog člana utvrđuje rješenjem nadležno odjeljenje u roku od 60 dana od dana uredno podnesenog zahtjeva.
- (3) Rok za podnošenje zahtjeva iz stava 1 ovog člana je jedna godina od dana otpočinjanja obavljanja ugostiteljske djelatnosti.
- (4) Troškovi postupka iz stava 1 ovog člana snosi ugostitelj.

##### **Član 26**

- (1) Rješenje iz člana 25 stava 2 ovog zakona upisuje se u registar o kategorizaciji ugostiteljskih objekata koji vodi nadležno odjeljenje.
- (2) Gradonačelnik će na prijedlog šefa nadležnog odjeljenja donijeti propis o obliku, sadržaju i načinu vođenja registra iz stava 1 ovog člana.

##### **Član 27**

Protiv rješenja o ispunjavanju minimalnih uslova i uslova za kategoriju ugostiteljskog objekta može se izjaviti žalba Apelacionoj komisiji Brčko distrikta BiH.

## **Član 28**

- (1) Nadležno odjeljenje po službenoj dužnosti svake tri godine provodi ponovnu kategorizaciju ugostiteljskih objekata.
- (2) O provedenoj kategorizaciji iz stava 1 ovog člana nadležno odjeljenje donosi rješenje koje se upisuje u registar iz člana 26 ovog zakona.
- (3) Ako se utvrdi da objekat više ne ispunjava uslove za utvrđenu kategoriju, rješenjem će se utvrditi nova kategorija objekta.
- (4) U slučaju iz stava 3 ovog člana troškove postupka snosi ugostitelj.

## **Član 29**

Zahtjev ugostitelja iz člana 23 ovog zakona sadrži:

1. naziv i sjedište ugostitelja;
2. vrstu, naziv i adresu ugostiteljskog objekta;
3. usluge koje će biti predmet poslovanja ugostiteljskog objekta;
4. podatak posluje li ugostitelj u ugostiteljskom objektu tokom cijele godine ili sezonski i
5. ostala dokumentacija po zahtjevu nadležnog odjeljenja.

## **Član 30**

- (1) Zahtjev ugostitelja iz člana 25 stava 1 ovog zakona sadrži:
  1. prijedlog kategorije ugostiteljskog objekta;
  2. podatke i dokaze o odgovornom licu u skladu sa odredbama člana 21 ovog zakona i
  3. druge podatke o ugostiteljskom objektu ukoliko je potrebno.
- (2) Gradonačelnik će na prijedlog šefa nadležnog odjeljenja propisati obrazac zahtjeva iz stava 1 ovog člana.

## **Član 31**

Rješenje o ispunjavanju uslova iz članova 23 i 25 ovog zakona izdat će se ugostitelju koji ispunjava sljedeće uslove:

1. da je registrovan za obavljanje ugostiteljske djelatnosti;
2. da ima pravo korištenja poslovnim prostorom;
3. da objekat u kojem će se obavljati ugostiteljska djelatnost ispunjava uslove propisane za određenu vrstu odnosno kategoriju;
4. da ispunjava i druge uslove propisane ovim zakonom i propisima donesenim na osnovu ovog zakona.

## **Član 32**

- (1) Minimalni uslovi utvrđeni rješenjem iz člana 23 stava 2 i člana 25 stava 2 ovog zakona prestaju da važe ako ugostitelj ne započne sa radom u ugostiteljskom objektu u roku od tri mjeseca od dana pravosnažnosti rješenja, prestankom poslovanja ugostitelja u ugostiteljskom objektu ili smrću nosioca rješenja.
- (2) Nadležno odjeljenje rješenjem utvrđuje prestanak važenja uslova iz stava 1 ovog člana.
- (3) Rješenje iz stava 2 ovog člana upisuje se u registar iz člana 23 stava 3 i člana 26 stava 1 ovog zakona.



## **V. UGOSTITELJSKE USLUGE U POKRETNOM OBJEKTU I SLIČNO**

### **Član 33**

- (1) Pojedine ugostiteljske usluge mogu se pružati i u pokretnom objektu koji se ne smatra ugostiteljskim objektom u smislu člana 15 ovog zakona, ako ispunjava tehničke uslove.
- (2) Ugostiteljske usluge mogu se pružati pod šatorom, na klupama i sl., ako su ispunjeni tehnički uslovi.
- (3) Objekat iz stava 1 ovog člana je objekat koji se može premještati iz jednog mjesta na drugo vlastitim pogonom ili vučom.
- (4) Odjeljenje nadležno za urbanizam utvrđuje prostore na kojima se mogu pružati usluge u objektu iz stavova 1 i 2 ovog člana.
- (5) Gradonačelnik će na prijedlog šefa odjeljenja nadležnog za ugostiteljstvo propisati tehničke uslove koje moraju ispunjavati objekti iz stavova 1 i 2 ovog člana, vrste i način pružanja ugostiteljskih usluga u tom objektu.

## **VI. KAMPOVANJE**

### **Član 34**

- (1) Kampovanje u smislu ovog zakona je boravak gosta pod šatorom, u kamp-kućici, kamp-prikolici i drugoj odgovarajućoj opremi za smještaj na otvorenom prostoru.
- (2) Kampovati je dozvoljeno isključivo u kampu.

## **VII. UGOSTITELJSKE USLUGE GRAĐANA U DOMAĆINSTVU, SEOSKOM DOMAĆINSTVU I NA PLOVNOM OBJEKTU**

### **1. UGOSTITELJSKE USLUGE U DOMAĆINSTVU**

#### **Član 35**

- (1) Pod uslovima određenim ovim zakonom i drugim propisima, građanin može:
  1. iznajmljivati gostima sobe, apartmane i kuće za odmor kojih je vlasnik, do ukupno najviše 10 soba odnosno 20 postelja;
  2. organizovati kamp na svojem zemljištu za najviše 10 smještajnih jedinica, odnosno 30 gostiju istovremeno.
- (2) Građanin može pružati i usluge doručka, polupansiona ili pansiona samo gostima kojima izdaje sobe, apartmane i kuće za odmor.

#### **Član 36**

- (1) Za pružanje ugostiteljskih usluga građana u domaćinstvu objekti iz člana 35 ovog zakona moraju ispunjavati minimalne uslove i uslove za kategoriju.
- (2) Gradonačelnik će na prijedlog šefa odjeljenja nadležnog za ugostiteljstvo propisati minimalne uslove i uslove za kategoriju, elemente i mjerila za kategorizaciju, kao i način kategorizacije pojedinih objekata iz stava 1 ovog člana.
- (3) Nadležno odjeljenje na zahtjev građana utvrđuje jesu li ispunjeni minimalni uslovi i uslovi za kategoriju za objekte iz člana 35 stava 1 ovog zakona.
- (4) Odredbe članova od 23 do 31 ovog zakona kojima se propisuje postupak za utvrđivanje minimalnih uslova i uslova za kategoriju ugostiteljskih objekata, na odgovarajući način primjenjuju se i na pružanje ugostiteljskih usluga građana u domaćinstvu.

### **Član 37**

Građanin koji pruža usluge iz člana 35 ovog zakona mora ispunjavati zdravstvene uslove za rad u ugostiteljstvu u skladu s posebnim propisima.

### **Član 38**

- (1) Građanin koji pruža usluge iz člana 35 ovog zakona dužan je:
1. vidno istaknuti oznaku vrste i kategorije objekta u kojem pruža usluge;
  2. vidno istaknuti naziv usluga koje pruža na ulazu u objekat ili u neposrednoj blizini s propisanim oznakama;
  3. utvrditi normative namirnica, pića i napitaka za pojedine usluge prehrane, pića i napitaka, ako takve usluge pruža i pružiti usluge po utvrđenim normativima, te na zahtjev normativ predložiti gostu;
  4. vidno istaknuti cijene usluga koje nudi i iznos boravišne takse, na propisan i uobičajen način, te se pridržavati istaknutih cijena;
  5. izdati gostu račun s naznačenom vrstom, količinom i cijenom pruženih usluga za svaku pruženu uslugu, a kod pružanja usluge smještaja navesti u računu i iznos boravišne takse;
  6. voditi knjige gostiju;
  7. dostaviti normative i cjenovnike na ovjeru kod nadležnog odjeljenja najkasnije sedam dana prije njihove primjene.
- (2) Prilikom oglašavanja i reklamiranja usluga i isticanja poruka u propagandnim materijalima, građanin ne smije koristiti oznaku propisane vrste i kategoriju objekata koja nije utvrđena rješenjem nadležnog odjeljenja.
- (3) Gradonačelnik će na prijedlog šefa odjeljenja nadležnog za ugostiteljstvo propisati oblik i sadržaj obrasca i način vođenja knjiga gostiju iz stava 1 tačke 6 ovog člana.

### **Član 39**

- (1) Pri pružanju usluga iz člana 35 ovog zakona građaninu mogu pomagati članovi njegovog domaćinstva.
- (2) Građanin koji pruža usluge iz člana 35 ovog zakona ne može biti poslodavac niti koristiti rad osoba koje nisu članovi njegovog domaćinstva.
- (3) U slučaju iz stava 1 ovog člana, članovi domaćinstva moraju ispunjavati zdravstvene uslove za rad u ugostiteljstvu u skladu s posebnim propisima.

### **Član 40**

- (1) Za pružanje usluga iz člana 35 ovog zakona, građanin je dužan pribaviti odobrenje nadležnog organa.
- (2) Odobrenje iz stava 1 ovog člana izdat će se građaninu koji ispunjava sljedeće uslove:
1. da je državljanin BiH,
  2. da je poslovno sposoban,
  3. da je vlasnik objekta (soba, apartman ili kuća za odmor i sl.) ili vlasnik zemljišta za kamp,
  4. da ispunjava propisane zdravstvene uslove,
  5. da je pribavio rješenje da objekat u kojem ili pomoću kojeg namjerava pružati usluge ispunjava minimalne uslove, te da je kategorizovan u skladu sa Zakonom, ako je za objekat propisana obaveza kategorizacije,

6. da mu nije pravosnažnom sudskom odlukom ili rješenjem o prekršaju izrečena zaštitna mjera zabrane pružanja usluga građana u domaćinstvu dok ta mjera traje.
- (3) Odobrenje iz stava 1 ovog člana može se izdati samo jednom članu zajedničkog domaćinstva.

#### **Član 41**

- (1) O odobrenju iz člana 40 stava 1 ovog zakona, nadležno odjeljenje rješava rješenjem u roku od 30 dana od dana uredno podnesenog zahtjeva.
- (2) Ako nadležno odjeljenje ne donese rješenje iz stava 1 ovog člana u propisanom roku ili ne donese rješenje kojim se zahtjev odbija zbog neispunjavanja propisanih uslova, građanin može započeti s pružanjem usluga, o čemu je dužan prethodno pismeno obavijestiti nadležno odjeljenje.
- (3) Nadležno odjeljenje dužno je donijeti rješenje iz stava 1 ovog člana u roku od 30 dana od dana primljene obavijesti iz stava 2 ovog člana.
- (4) Ako nadležno odjeljenje utvrdi da nisu ispunjeni uslovi propisani ovim zakonom, a građanin je započeo sa radom na osnovu stava 2 ovog člana, odredit će rok za ispunjavanje tih uslova.
- (5) Nadležno odjeljenje dostavit će rješenje iz stava 1 ovog člana Poreznoj upravi, tržišnoj i sanitarnoj inspekciji.

#### **Član 42**

Rješenje o odobrenju za pružanje usluga građana u domaćinstvu sadrži:

1. ime i prezime građanina i JMBG,
2. mjesto, ulicu i broj objekta u kojem se pruža usluga,
3. vrstu usluge i broj gostiju kojima se usluga može pružiti,
4. naznaku o pružanju usluga tokom cijele godine ili sezonski,
5. kategoriju objekta u kojem pruža uslugu.

#### **Član 43**

- (1) Rješenje o odobrenju za pružanje usluga građana u domaćinstvu upisuje se u registar o obavljanju ugostiteljskih usluga u domaćinstvu koji vodi nadležno odjeljenje.
- (2) Gradonačelnik će na prijedlog šefa nadležnog odjeljenja propisati oblik, sadržaj i način vođenja registra o obavljanju ugostiteljskih usluga građana u domaćinstvu.

#### **Član 44**

- (1) Odobrenje za pružanje usluga u domaćinstvu prestaje da važi:
  1. odjavom građanina, danom navedenim u odjavi ili danom podnošenja odjave nadležnom odjeljenju, ako je građanin u odjavi naveo datum unatrag,
  2. ako građanin ne započne pružati usluge u roku od šest mjeseci od dana pravosnažnosti rješenja o odobrenju,
  3. ako prestane ispunjavati koji od uslova navedenih u članu 40 stavu 2 ovog zakona,
  4. ako je inspeksijskim nadzorom utvrđeno da nisu ispunjeni uslovi propisani ovim zakonom, propisima donesenim na osnovu ovog zakona i drugim propisima, a utvrđeni nedostaci nisu otklonjeni u zadanom roku,
  5. ako nadležno odjeljenje naknadno utvrdi da je rješenje o odobrenju zasnovano na neistinitim podacima ili krivotvorenim dokazima.
- (2) O prestanku odobrenja iz stava 1 ovog člana nadležno odjeljenje donosi rješenje i dostavlja ga Poreznoj upravi, tržišnoj i sanitarnoj inspekciji.

## **2. UGOSTITELJSKE USLUGE U SEOSKOM DOMAĆINSTVU**

### **Član 45**

- (1) U domaćinstvu koje je organizovano kao turističko seosko domaćinstvo (u daljnjem tekstu: seosko domaćinstvo), član seoskog domaćinstva može pružati usluge iz člana 35 stava 1 tačke 1, osim iznajmljivanja kuća za odmor, i člana 35 stava 1 tačke 2 ovog zakona.
- (2) Osim usluga iz stava 1 ovog člana, u seoskom domaćinstvu mogu se pripremati i usluživati topla i hladna jela te pića i napici iz pretežno vlastite proizvodnje za najviše 50 osoba (izletnika) istovremeno.
- (3) Gradonačelnik će na prijedlog šefa odjeljenja nadležnog za ugostiteljstvo, uz mišljenje šefa nadležnog za poljoprivredu, propisati šta se smatra seoskim domaćinstvom, minimalne uslove, uslove za kategoriju i način kategorizacije objekata u kojima se pružaju usluge iz ovog člana.
- (4) Na pružanje usluga u seoskom domaćinstvu na odgovarajući način primjenjuju se odredbe članova od 36 do 44 ovog zakona.
- (5) Gradonačelnik će na prijedlog šefa odjeljenja nadležnog za ugostiteljstvo, uz mišljenje šefa nadležnog za poljoprivredu, propisati šta se smatra pretežno vlastitom proizvodnjom, te vrstu proizvoda koji ne moraju biti iz vlastite proizvodnje u smislu stava 2 ovog člana.

## **3. UGOSTITELJSKE USLUGE NA PLOVNOM OBJEKTU**

### **Član 46**

- (1) Pod uslovima utvrđenim ovim zakonom i drugim propisima, građanin može pružiti usluge prehrane, pića i napitaka na svojem plovnom objektu za najviše 20 gostiju istovremeno.
- (2) Usluge iz stava 1 ovog člana građanin ne smije pružati u lukama, pristaništima i sidrištima.
- (3) Gradonačelnik će na prijedlog šefa odjeljenja nadležnog za ugostiteljstvo propisati minimalne uslove, kao i način utvrđivanja minimalnih uslova koje moraju ispunjavati objekti iz stava 1 ovog člana.
- (4) Na pružanje usluga iz stava 1 ovog člana na odgovarajući način primjenjuju se odredbe članova od 36 do 44 ovog zakona.

## **VIII. NADZOR**

### **Član 47**

- (1) Inspekcijski nadzor nad provođenjem ovog zakona i propisa donesenim na osnovu ovog zakona, te pojedinačnih akata, uslova i načina rada provode tržišna inspekcija i druge inspekcije, svaka u okviru svoje nadležnosti, u skladu s posebnim propisima.
- (2) U provođenju inspekcijskog nadzora inspektor je ovlašten pregledati: poslovne i druge prostorije i prostore u kojima se obavlja ugostiteljska djelatnost, robu, uređaje i opremu kojom se obavlja ugostiteljska djelatnost, poslovne knjige, ugovore i drugu poslovnu dokumentaciju, kao i isprave na osnovu kojih se može utvrditi identitet lica koja se zateknu u obavljanju djelatnosti.

## Član 48

Tržišni inspektor donijet će rješenje kojim će zabraniti obavljanje ugostiteljske djelatnosti ili pružanje pojedine ugostiteljske usluge, ako:

1. pravno ili fizičko lice obavlja ugostiteljsku djelatnost ili pruža pojedine ugostiteljske usluge, a da nije upisano u propisani registar odnosno u registar iz člana 4 stava 3 i člana 43 stava 1 ovog zakona, izuzev u slučaju iz člana 41 stava 2 ovog zakona;
2. pravno ili fizičko lice obavlja ugostiteljsku djelatnost ili pruža ugostiteljske usluge, a da nije pribavilo rješenje da objekat u kojem pruža te usluge ispunjava uslove propisane ovim zakonom i propisima donesenim na osnovu ovog zakona, izuzev u slučaju iz člana 24 stava 1 ovog zakona;
3. pravno ili fizičko lice iz člana 4 stava 1 ovog zakona pruža ugostiteljsku uslugu licima koja nisu njihovi radnici, članovi, penzioneri te članovi uže porodice njihovih radnika i penzionera s prebivalištem u BiH.

## Član 49

- (1) Tržišni inspektor u provođenju rješenja iz člana 48 ovog zakona će zapečatiti ili na drugi pogodan način zatvoriti ugostiteljski objekat u kojem se obavlja ugostiteljska djelatnost.
- (2) Predmet koji je upotrijebljen prilikom činjenja prekršaja tržišni inspektor može privremeno oduzeti do konačne odluke nadležnog suda.
- (3) Ukoliko se u objektu nalaze kvarljive namirnice, ugostitelj je dužan pisanim putem, u roku od 24 sata od dana pečačenja poslovnih prostorija, zatražiti da se zapečaćena prostorija privremeno otpečati i u prisutnosti inspektora iz njih iznesu kvarljive namirnice, nakon čega će tržišni inspektor ponovo zapečatiti poslovne prostorije o čemu će se sačiniti zapisnik.

## Član 50

- (2) Ako ugostiteljski objekat u kojem se pružaju usluge, uređaji i oprema ne udovoljavaju uslovima propisanim ovim zakonom i propisima donesenim na osnovu ovog zakona, tržišni inspektor naložit će otklanjanje utvrđenih nedostataka i nepravilnosti određujući rok u kojem se moraju otkloniti nedostaci i nepravilnosti.
- (2) Ako nedostaci i nepravilnosti iz stava 1 ovog člana ne budu otklonjeni u određenom roku, tržišni inspektor će zabraniti obavljanje ugostiteljske djelatnosti, odnosno pružanje pojedinih ugostiteljskih usluga, dok se nedostaci i nepravilnosti ne otklone.

## Član 51

- (1) Ako nedostaci i nepravilnosti iz člana 50 stava 1 ovog zakona ugrožavaju zdravlje ili život gostiju ili zaposlenih lica, tržišni inspektor će zabraniti obavljanje ugostiteljske djelatnosti, odnosno pružanje pojedinih ugostiteljskih usluga, dok se ti nedostaci i nepravilnosti ne otklone.
- (2) U slučaju iz stava 1 ovog člana, tržišni inspektor može naredbu izreći usmeno i zahtijevati izvršenje odmah bez odlaganja, a rješenje će izdati u roku od 48 sati.

## Član 52

- (1) Ako tržišni inspektor utvrdi da je oprema za kampovanje postavljena izvan kampa, rješenjem će narediti uklanjanje šatora, kamp-kućica, kamp-prikolica i druge opreme za kampovanje.
- (2) Rok za izvršenje mjere iz stava 1 ovog člana je 24 sata od uručenja rješenja.

## IX. KAZNENE ODREDBE

### Član 53

- (1) Novčanom kaznom od 500,00 KM do 5.000,00 KM kaznit će se za prekršaj ugostitelj ako:
- .1 obavlja ugostiteljsku djelatnost koju prema svom predmetu poslovanja nema pravo obavljati (član 7),
  - .2 prilikom oglašavanja i reklamiranja usluga koristi oznaku vrste i kategorije koja nije utvrđena rješenjem nadležnog odjeljenja (član 11),
  - .3 objekat ne ispunjava minimalne uslove ili ako za obavljanje ugostiteljske djelatnosti ili pružanje ugostiteljskih usluga nisu ispunjeni zdravstveni uslovi za rad u ugostiteljstvu u skladu s posebnim propisima (član 13),
  - .4 ugostiteljski objekat koji prestane ispunjavati uslove propisane za određenu vrstu i kategoriju objekta i dalje posluje kao ta vrsta i kategorija ugostiteljskog objekta (član 17),
  - .5 ugostitelj započne obavljati ugostiteljsku djelatnost u ugostiteljskom objektu prije nego što pribavi rješenje od nadležnog odjeljenja da su ispunjeni minimalni uslovi, osim u slučaju iz člana 24 stava 1 ovog zakona (član 20).
- (2) Za prekršaj iz stava 1 ovog člana kaznit će se odgovorno lice u iznosu od 300,00 KM do 800,00 KM.
- (3) Za prekršaje iz stava 1 ovog člana uz izrečenu novčanu kaznu ugostitelju će se oduzeti i imovinska korist pribavljena prekršajem.

### Član 54

- (1) Novčanom kaznom od 400,00 KM do 3.000,00 KM kaznit će se za prekršaj fizičko ili pravno lice ako:
1. ne udovoljava uslovima iz člana 4 ovog zakona ili ako pruža ugostiteljske usluge osobama koje nisu njeni radnici, članovi, penzioneri ili članovi uže porodice radnika i penzionera (član 4 stavovi 1 i 2),
  2. pružanje usluga u objektima zatvorenog tipa ne prijavi nadležnom odjeljenju (član 4 stav 3 ),
  3. objekat u kojem pruža ugostiteljske usluge ne ispunjava uslove propisane ovim zakonom i drugim propisima (član 4 stav 4).
- (2) Za prekršaj iz stava 1 ovog člana kaznit će se i odgovorno lice u pravnom licu novčanom kaznom od 200,00 KM do 500,00 KM.
- (3) Za prekršaj iz stava 1 ovog člana, izuzev tačke 2, tržišni inspektor može izreći i naplatiti pravnom, odnosno fizičkom licu mandatnu kaznu u iznosu od 200,00 KM.

### Član 55

- (1) Novčanom kaznom od 300,00 KM do 2.000,00 KM kaznit će se za prekršaj ugostitelj, odnosno drugo pravno lice iz člana 3 ovog zakona, ako:
1. ne utvrdi normative o utrošku namirnica, pića i napitaka, ne pruži usluge u količini i kvalitetu u skladu s normativima ili na zahtjev normativ ne predoči gostu (član 10 stav 1 tačka 4),
  2. vidno ne istakne cijene usluga na način dostupan gostima, ili ako se ne pridržava istaknutih i objavljenih cijena, ili ako kod pružanja usluga smještaja u cjenovnicima ne istakne iznos boravišne takse (član 10 stav 1. tačka 5),

3. ne izda gostu račun sa specifikacijom usluga i navedenim iznosom boravišne takse ili za svaku pojedinačno ostvarenu uslugu ne izda gostu blok-registar blagajne (član 10 stav 1 tačka 6),
  4. ne vodi knjige gostiju u ugostiteljskom objektu za smještaj (član 10 stav 1 tačka 7),
  5. ne vodi knjigu žalbi na propisani način, te ako ne poštuje rokove postupka po izjavljenom prigovoru gosta (član 10 stav 1 tačka 8),
  6. u ugostiteljskom objektu ne vodi u skladu s propisima evidenciju o nabavljenim i utrošenim količinama hrane, pića i napitaka (član 10 stav 1 tačka 9),
  7. uslužuje alkoholna pića gostu mlađem od 18 godina (član 10 stav 2),
  8. u ugostiteljskom objektu nije odredio odgovorno lice (član 21 stavovi 1 i 2),
  9. odgovorno lice ne ispunjava propisane uslove (član 22),
  10. pruža ugostiteljsku uslugu u pokretnom objektu, pod šatorom, na klupama i sl., koji ne ispunjavaju minimalne uslove ili pruža ugostiteljske usluge u pokretnom objektu, pod šatorom, na klupama i sl. na prostoru koji nije odredilo odjeljenje nadležno za urbanizam (član 33 stavovi 1, 2 i 4).
- (2) Za prekršaj iz stava 1 tačke od 1 do 6 ovog člana kaznit će se odgovorno lice novčanom kaznom od 100,00 KM do 400,00 KM.
  - (3) Uz izricanje novčane kazne može se izreći i zaštitna mjera oduzimanja predmeta prekršaja (tačka 6 ovog člana).
  - (4) Za prekršaje iz stava 1 tačke od 1 do 6 ovog člana tržišni inspektor može izreći i naplatiti ugostitelju mandatnu kaznu u iznosu od 200,00 KM, a odgovornom licu u iznosu od 50,00 KM.

#### **Član 56**

- (1) Novčanom kaznom od 200,00 KM do 1.000,00 KM kaznit će se za prekršaj ugostitelj, ako:
  1. vidno ne istakne na ulazu u ugostiteljski objekat oznaku vrste, naziv i kategoriju ugostiteljskog objekta (član 10 stav 1 tačka 1),
  2. na ulazu u ugostiteljski objekat vidno ne istakne radno vrijeme i ako se ne pridržava istaknutog radnog vremena (član 10 stav 1 tačka 2),
  3. u ugostiteljskom objektu za smještaj ne utvrdi kućni red i ne istakne ga na recepciji, sobama i apartmanima (član 10 stav 1 tačka 3),
  4. u ugostiteljskom objektu u kojem se pružaju usluge naturistima uz naziv vrste i kategorije objekta ne istakne i oznaku da se u tom objektu pružaju usluge naturistima ili takve usluge pruža na prostorima koje nije odredilo odjeljenje nadležno za urbanizam (član 10 stavovi 4 i 5),
  5. pruža jednostavnu ugostiteljsku uslugu suprotno odredbama člana 12 ovog zakona.
- (2) Za prekršaje iz stava 1 ovog člana kaznit će se i odgovorno lice novčanom kaznom od 100,00 KM do 300,00 KM.
- (3) Za prekršaje iz stava 1 ovog člana tržišni inspektor može izreći i naplatiti ugostitelju mandatnu kaznu u iznosu od 100,00 KM, a odgovornom licu mandatnu kaznu u iznosu od 50,00 KM.

#### **Član 57**

- (1) Novčanom kaznom od 250,00 KM do 2.500,00 KM kaznit će se za prekršaj građanin, ako:



1. iznajmljuje gostima sobe, apartmane i kuće za odmor sa više od 10 soba, odnosno 20 postelja ili organizuje kamp za više od 10 smještajnih jedinica, odnosno 30 gostiju istovremeno (član 35 stav 1),
  2. pruža usluge doručka, polupansiona ili pansiona suprotno stavu 2 člana 35 ovog zakona,
  3. objekat u kojem pruža usluge ne ispunjava minimalne uslove i uslove za kategoriju (član 36),
  4. ne ispunjava zdravstvene uslove za rad u ugostiteljstvu (član 37),
  5. ne utvrdi normative i ne pruži usluge po utvrđenim normativima, te na zahtjev gosta ne predoči normativ (član 38 stav 1 tačka 3),
  6. vidno ne istakne cijene usluga koje nudi i iznos boravišne takse i ako se ne pridržava istaknutih cijena (član 38 stav 1 tačka 4),
  7. ne izda gostu račun u skladu s propisom, a kod pružanja usluge smještaja ne navede i iznos boravišne takse (član 38 stav 1 tačka 5),
  8. ne vodi knjige gostiju (član 38 stav 1 tačka 6),
  9. ne ovjeri normative i cjenovnike (član 38 stav 1 tačka 7),
  10. prilikom oglašavanja i reklamiranja usluga koristi oznaku vrste i kategorije objekta koja nije utvrđena rješenjem nadležnog organa (član 38 stav 2),
  11. postane poslodavac i koristi rad lica koja nisu članovi njegovog domaćinstva (član 39 stav 2),
  12. članovi domaćinstva koji mu pomažu pružati usluge ne ispunjavaju zdravstvene uslove za rad u ugostiteljstvu (član 39 stav 3),
  13. pruža usluge bez pribavljenog odobrenja nadležnog organa u skladu sa odredbama člana 40, osim u slučaju iz člana 41 stava 2 ovog zakona,
  14. pruža usluge smještaja, prehrane, pića i napitaka u seoskom domaćinstvu u suprotnosti sa članom 45 ovog zakona,
  15. pruža usluge prehrane, pića i napitaka na plovnom objektu za više od 20 gostiju istovremeno (član 46 stav 1),
  16. pruža usluge na plovnim objektima u lukama, pristaništima i sidrištima (član 46 stav 2).
- (2) Za prekršaje iz stava 1 ovog člana, izuzev tačke 13, tržišni inspektor može izreći i naplatiti građaninu mandatnu kaznu u iznosu od 50,00 KM.

#### **Član 58**

- (1) Novčanom kaznom od 200,00 KM do 1.500,00 KM kaznit će se za prekršaj građanin, ako:
1. vidno ne istakne oznaku vrste i kategorije objekta u kojem pruža usluge (član 38 stav 1.tačka 1),
  2. na ulazu u objekat ili neposrednoj blizini ne istakne naziv usluga koje pruža (član 38 stav 1 tačka 2).
- (2) Za prekršaje iz stava 1 ovog člana tržišni inspektor može izreći i naplatiti građaninu mandatnu kaznu u iznosu od 50,00 KM.

#### **Član 59**

- (1) Novčanom kaznom od 200,00 KM do 1.500,00 KM kaznit će se za prekršaj lice koje kampuje izvan kampa (član 34 stav 2).



- (2) Za prekršaj iz stava 1 ovog člana tržišni inspektor može izreći i naplatiti licu iz stava 1 ovog člana mandatnu kaznu u iznosu od 50,00 KM.

#### **Član 60**

Za prekršaje utvrđene članovima 53 i 54 ovog zakona počinjene drugi put u roku od dvije godine, uz novčanu kaznu, izreći će se ugostitelju i zaštitna mjera zabrane obavljanja ugostiteljske djelatnosti u trajanju od tri mjeseca do jedne godine.

### **X. PRIJELAZNE I ZAVRŠNE ODREDBE**

#### **Član 61**

- (1) Ugostitelji koji na dan stupanja na snagu ovog zakona obavljaju ugostiteljsku djelatnost, dužni su pribaviti rješenje iz člana 25 stava 2 ovog zakona u roku od jedne godine od dana stupanja na snagu ovog zakona.
- (2) Ugostitelji koji na dan stupanja na snagu ovog zakona obavljaju ugostiteljsku djelatnost dužni su uskladiti minimalne uslove s propisima iz člana 13 stava 3 ovog zakona u roku od jedne godine od dana stupanja na snagu ovog zakona.
- (3) Ugostitelju koji ne pribavi rješenje iz stava 1 ovog člana, odnosno ne uskladi minimalne uslove iz stava 2 ovog člana, nadležno odjeljenje donijet će rješenje o prestanku obavljanja ugostiteljske djelatnosti.

#### **Član 62**

- (1) Građani koji na dan stupanja na snagu ovog zakona pružaju ugostiteljske usluge u domaćinstvu, dužni su pribaviti rješenje u ispunjavanju minimalnih uslova i uslova za kategoriju za objekte u kojima pružaju usluge u roku od jedne godine od dana stupanja na snagu propisa iz člana 36 stava 2 ovog zakona.
- (2) Građaninu koji ne uskladi rješenje iz stava 1 ovog člana, nadležno odjeljenje će donijeti rješenje o prestanku pružanja ugostiteljskih usluga.

#### **Član 63**

Ugostitelji koji na dan stupanja na snagu ovog zakona obavljaju ugostiteljsku djelatnost dužni su u svakom ugostiteljskom objektu odrediti odgovorno lice, u skladu sa ovim zakonom, u roku od jedne godine od dana stupanja na snagu ovog zakona.

#### **Član 64**

Propise na osnovu ovlaštenja iz ovog zakona gradonačelnik će donijeti u roku od šest mjeseci od dana stupanja na snagu ovog zakona.

#### **Član 65**

Skupština će donijeti propise iz ovog zakona u roku od šest mjeseci od dana stupanja na snagu ovog zakona.

#### **Član 66**

Do stupanja na snagu propisa iz članova 64 i 65 ovog zakona, ostaju na snazi propisi entiteta koji su se primjenjivali u vrijeme donošenja ovog zakona.

### **Član 67**

Danom stupanja na snagu ovog zakona prestaju važiti odredbe koje se odnose na ugostiteljstvo Zakona o turizmu i ugostiteljstvu («Sl. glasnik RS» br. 32/94) i odredbe koje se odnose na ugostiteljstvo Zakona o turističkoj i ugostiteljskoj djelatnosti («Sl. novine FBiH» br. 19/96).

### **Član 68**

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Босна и Херцеговина

**БРЧКО ДИСТРИКТ**

БОСНЕ И ХЕРЦЕГОВИНЕ

СКУПШТИНА БРЧКО ДИСТРИКТА

Bosna i Hercegovina

**BRČKO DISTRIKT**

BOSNE I HERCEGOVINE

SKUPŠTINA BRČKO DISTRIKTA

Broj: 0-02-022-289/05

Brčko, 31. oktobar 2005. godine

PREDSJEDNIK

SKUPŠTINE BRČKO DISTRIKTA BiH

**Prof. dr. Milan Tomić**